

Juanpan Icoinra Huafó Cunushoni

Diosin tsainman noco nimapacutiro

¹ Unquian, Juan, un mato cunu fomai man tapinon. Jesucristohuunoa un mato tapimani. Un nicafain un oinyanan un mucuman mucoinmisi cuscan un ahuunoa mato yoi man tapinon. Ahuashta oniataima Jesús apa Dios fu iyopaoni. Upa Diosin ahuun tsain noco yoipaiyai cuscan Jesús noco tapimapaoni. Ascashon ahuunshon non Diosin tsain tapitiro noco nimapacuai.

² Apa Dios fu iflashu noocoqui fotoni. Nanton noco nimapacutiro. Ascashon non oian cuscan un mato yoi.

³ Upa Dios futan Furun Jesucristo shinainfo cuscarí norifi atohuunshon non shinamisi. Shinainfo cuscan non huai. Non atofu rafumisi. Ascashon non oian cuscan huafain non nica cuscari un mato yoi marifi nannorifosi man shinanon. Ascashu man no fu rafusharatiro.

⁴ Un mato cunu fomai non unimai cuscari marifi man unimanon. Non natian unimayofiai man marifi nannorifosi shinainno non fasi mimacai unimatiroquin.

Jesushuunshon chacapan afanan nocon ifo itiroma

⁵ Ascan Diospan Furun yoini cuscan nicashon non mato yoi. Noco isca huani, —Farin chashainocai faquishtiroma. Nanscarifiai Diosin shara

fustisi icanocai ahua chaca afu itiromaran, —ishon noco yoini.

⁶ Ascafia non yoiquin isca hua, —Non Diosin shinain cuscarí norifi nannorifosi non shinanmisi. Non afu rafuaran, —ifiashon non chaca huashu non chania. Diosin iconquin yoimisi cuscan non aimá.

⁷ Ascatamarocon ahuun tsain yoini cuscacoin non aafin fasi sharacoin itiroquin. Nanton shinain cuscan norifi nannorifosi shinanshquin afu rafushquin. Non ascaiton nocon chaca noco soashotiro. Jesús Upa Diospan Furumun ahuun imi foyanan noco nashoni nantifi nocon chaca noco soashoshquin.

⁸ Ascafia non yoiquin isca hua, —Uncai chaca huama, —ifiatan nonnofiri paramumisi. Jesús iconquin yoimisi cuscan nocon nomuran non nanucoianma.

⁹ Ascatamarocon nocon chaca non yoaiton Upa Diosin yoini cuscan noco rau huatiro. Non chaca huamisi cuscan afanan Upa Diosin shinantiroma Furumun noco nashoni nocon chaca soashoshquin. Upa Diosin sharacoinsón noco yoini cuscan nanscacoin huai. Nantifi nocon chaca noco soashotiro non chaca huamisima cuscara non inon.

¹⁰ —Nantifi yorafoan chaca huamisforan, —Diosin huani. Ascafia non yoiqui, —Uncai ahua chaca huamisimaran, —ishon non futsafo shinamatiro —Diosin noco pararan, —ishon anori yoiquicai noncái ahuun tsain icoinra huacoin-nama.

*Criston Apa Dios nocohuunoa yoisharatiro
noco onaintimanonma*

¹ Uhuun yora mishtichin, un mato cunushoni man oinshon ahua chaca huanonma. Ascafia ahuara non chaca huacun Jesucristo apa noco yoishatiro nocon chaca soanon. Yoiquin isca huatiro, —Upa, un ato nashoniquin. Aton chaca soashohuun, —Apa huatiro. Atoncai ahua chaca huamisima. Afin shafacafi icaquin. Ascan Apa Dios noco yoishotiro nocon chaca soashonon.

² Noco nashonishaquin nocon chaca noco soashotiro. Noco fustima. Nantifi manifotihuunoashu noco nashoni nocon chaca soashoshquin.

³ Ascan Jesús noco yoimisi cuscan aquin non tapitiro non afu rafui. Nanton shinain cuscan non tapitiro norifi nannori shinanquin.

⁴ Futsan shinanquin isca huatiro, —Un Jesús fu rafuiran, —ifiatan yoitimacoin. Ahuun tsain nicacasmai. Nan cuscara yorafin chanmisiquin. Jesús icon yoimisi cuscan ahuun nomuran nanucoianma.

⁵ Ascan ratoran yoran ahuun tsain nicacoinqufin Dios noicoinquin. Ascashofin tapitiroqui afu rafucoiai.

⁶ Ascan futsan shinanquin isca huai, —Un Jesús fu rafucoinran, —icafin Jesús icai cuscari arifi itiroquin.

Noco yononi cuscan tsain funa shara

⁷ Ascan un mato cunushonai cuscan man man nicamisi. Jesús maton ifo iqui taunitian mato yononi man man nicamisiquin. Mato yonoa cuscan mato tapimani.

⁸ Ascafia ahuun tsain tsoan nicayomisima cuscara un mato cunushoni. Noco yonoquin isca huani, —Yorafohuun noicoincahuun, —noco huani. Manascaicai man chaca huapaoni cuscan afanan man atiroma. Jesús shafacafi ica cuscan marifi ahuunoashu man shafacafi itiro.

⁹ Ascafia ratoran yoran yoiquin, —Un Jesushuunoashu shafacafi icaran, —ifiatan yora noicas-mashu aacai shafacafi icama. Atoncai Diosin tsain nicacoiantaima.

¹⁰ Tsoan yorafohuun noi aafin shafacafi icaquin. Oinsharaicai non pacutiroma. Nanscarifi aquin tsoan shafacafi ishoncái ahua chaca huafafaintiroma.

¹¹ Ascafia ratoran futsan futsa noicasmaicai aacai shafacafi icama. Chaca huafafaini. Chaca huafafainquicai ahuun nomuran shinantiroma ahuun chaca shatushquin. Ascafia tapiama man fasi funocoian.

¹² Uhuun facumishtichin maton chaca Jesushuun-shon Upa Diosin man soashona afanan afo shinanshquima. Ascacun un nannori mato cunushoni.

¹³ Ahuashta oniataima Upa Dios iyopaoni. Anifomishtichin, ahuu cuscaramain Upa Diosiquin man man tapia. Tapishon man icoirra huamisi. Ascan un matori cunushoni.

Pushcohuaifoan Satanás mato amapaiyai cusca-cái man amisima Jesús tanasharashquin. Ascan un matori cunushoni.

Uhuun facufoan marifi nocon Upa Dios ahuu cuscaramainquin man man tapia. Tapishon man icoirra huai. Ascan un matori cunushoni.

14 Anifomishtichin, un cunua cuscan ahua oniataima Upa Dios iyopaoni. Nanmain ahuu cuscaraquin man man tapia. Ascan un nan-nori mato cunushoni.

Pushcohuaifoan, Satanás mato amapaiyai cusca-cái man amisima. Jesús tanasharashquin. Ascan Jesushuunoashu man mutsisipacoin. Diospan tsain maton nomuran man man nanua icoinra huafafainshcaquin.

15 Ascatan ahuarafaan Upa Diosimaqui noco imapaiyaifo afo noiyamacahuun. Ahuarafa yora chacafoan aton nomurān shinainfo cuscan afo noiyamacahuun. Afo noiiquicai man Dios noicointiroma.

16 Ahuara chacafo aton ifono yorafo imisi cuscan un mato tapimai. Ahuara chaca fuchipaifain ahuara chaca oinquin mupaimisi icain —Un ahuarayashufin un isharaquin un futsafo finoncoian. Uncai futsafo cuscarama, —icashu cacapaimisi. Ascará chacafoai Upa Diosin noco amapaima. Ascará chacafoan yoshin chacahuunshon noco amapai.

17 Ascafia ahuara chacafo cuyoi futsui. Ahuara chacafo yorafoan fuchipaiyaifo cuscari nanfori cuyoi futsui. Asca Diosin noco amapaiyai cussashu nanfo Upa Dios fu ipashquicani.

Iconmisihuunoa yafi chanimisi

18 Ascan uhuun yoramishtichin un tsain futsari mato yoi man tapinon. Diosin nantifi maitio nan chaca huamisifo onaintimayoi. Man nocoti chaima. Man man nicamisiri nan nocofunun Cristo noicasmai arifi oshquin. Natianri Cristo noicasmai nococani. Ascacun non tapitiro Upa

Diosin nan chaca huamisifo onaintimaitian no-coti chaima.

¹⁹ Nan yorafoan no futan Cristohuunoa nicay-ofiapaonishaquin noco potafo. Ascaifoan non tapitiro no futan Cristo icoinra huacoinmisima. Noco potafo. Ascaiton non tapitiro afocai no fu Cristo yorama.

²⁰ Ascafia mancai ato cuscarama. Upa Diosin ahuun Yoshin Shara matoqui nichini matofu rafupacunon. Asca ahuunshon man iconcoin tapia.

²¹ Mancai icon tapiamama. Ascacucai un mato cunushonima. Ahuara icon iyamarai iconma man Diospan Yoshin Sharahuunshon tapicoian. Man tapiari nan chanimisifoancai noco icon yoitirofoma.

²² Ratofomain chanimisiquin un mato tapimai. Tsoan isca huai, —Jesuscaí Cristoma. Diospan Furunmafiquin, —icafin chanimisiquin. Nan-scarafoan Cristo noicasmacani. Upa Dios yafi Furun icoinra huafoma.

²³ Ascatañ tsoan isca huai, —Criston Diospan Furunmaran, —icacai Upa Diosin yora itiroma.

²⁴ Ascatañ Jesushuunoa man nicaquin tauhuani cuscan cachiquiri huayamacahuun. Shafatifi ahuun tsain maton nomuran nanusharacahuun. Man ascafín Upa Dios yafi Furun fu man rafupacunacaquin.

²⁵ Noco yoiyotiani cuscan non afu ipasharatiroquin.

²⁶ Futsafoan mato amaquiri tapimapai. Ascan un atohuunoa mato cunushoni man tapinon.

²⁷ Ascafiaquin Upa Diosin ahuun Yoshin Shara matoqui nichini matofu rafupacunon. Natianri

ahuunshon man iconcoin tapia. Nan fusti non yopai noco tapimanon. Afin mato tapima cuscan shafatifi maton nomuran ahuun tsain nanucoincahuun ahuun afu rafushquin.

28 Uhuun yoramishtichin, Jesús mato tapima cuscan cachiquiri huayamacahuun. Shafatifi nicacoincahuun yoia cuscan aqui. Ascan Jesús noocoaino man aqui rafipaitiroma. Ascatamaroccon ahuun ointaifi ahuara chacafu man huamisi shinanshma man Jesús fu isharatiro.

29 Dios isharacoinmisi ahuashtacai chaca huamisima. Man man tapia. Tsoa isharamisi nanfin Upa Diosin imapacunacaquin ahuun facu inon. Nanri man tapia.

3

Diospan facufo

1 Upa Diosin nocohuun fasi noicoin. Noco-huun shinansharamisi. Ascanshon noco yoiquin isca huatiro, —Manfin uhuun facufoquin, —ishon yoitiro. ¡Aicho! Shinancapon. Iconcoin nonfin Diospan facufoquin. Ascafiaflashon icoindra huacoinyamashon Upa Dios onanmisifoma. Ascan non Diospan facufofiacun tapiafoma.

2 Uhuun yoramishtichin icon natian nonfin Diospan facufoquin. Noco chipo imai cuscan tsoan tapiataima. Ascafia Jesús oaiton oin non a cuscaracon ishquin. Nan man non tapian.

3 Tapiashu non a cuscara sharacoin ipaitiro. Ascashon nocon chaca non potatiro a cuscara sharacoin iishquin.

⁴ Tsoan chaca huafafainicai Diosin noco yononi cuscan aimá. Noco yonoa cuscan ayamashu chacacoin iqui.

⁵ Man man tapia nocon Ifo Jesús noco cuscara nocofunuri ini nocon chaca noco soashoshquin. Atocai chaca huamisima. Apa Diosin yonoa cuscan fustisi huapaoni.

⁶ Tsoan afu rafushocai chaca huafafaintiroma. Jesushuunoa tapiama. Ahuunoa onancointaima.

⁷ Uhuun yoramishtichin, futsafoan mato amaquiri yoipaicaní nocon Ifo tanatima huaquin. Ato nicayamacahuun. Tsoan isharamisi nocon Ifon cuscara shara itiro. Noco imasharatiro a cuscara isharamisi non inon.

⁸ Upa Diosin yora oni huataima yoshin chaca Satanás chaca huayopaoni. Ascan tsoan chaca huafafaini arifi Satanás ahuun yoraquin. Ascacufin Diospan Furun oniquin Satanás ahuun yono cuyo futsunon.

⁹ Upa Diosin noco nimapacunaca ahuun facufo non inon. Ascan tsoa ahuun facushocai chaca huafafaintiroma. Non ahuun yora ipaiquicai non chaca huamisi itiroma.

¹⁰ Ascan ratofomain Diospan facufo iyamarai Satanás ahuun yorafoquin non tapitiro. Tsoa Diosin yoia cuscan aimacai ahuun facu itiroma. Tsoan futsafo noiamacai arifi Diospan facu itiroma.

Nantifi noinantanancahuun

¹¹ Jesús ifoaquin tau huashon man nicamisi isca huaquin, —Noinancahuun, —ica man man nicamisi.

12 Caín cuscara iyamacahuun. Cainfin Satanás yora iniquin. Chipocu isharamisicun afi ascaya-maquin chipocu rutuni.

13-15 Non futsafo noishon non tapitiro Upa Diosin noco fiananan huaa non afanomitsiscapanaca muran catanmarocon non afu ipanon. Tsoan futsafo noiyamashu omitsiscapanacafo fu ipatiroquin. Tsoan futsa noicasmai aafin rutumitsamisi itiroquin. Man man tapia rutumitsamisi-cai Dios icano nocotiroma. Ascan icoingra huamafoan mato noicasmaino mustairiyamacahuun.

16 Jesucriston fasi nocohuun noiquin noco nashoni. Afi nocohunoashu napai noco nashoni. Futsafo noicoin atohuunoashuri non natiro.

17 Ascatai futsa ahuara yopacoinflaiton non atohuun ramapaiyamashucái Upa Diosin ato noiai cuscan non ato noiaima.

18 Ascan uhuun yoramishtichin, futsafo noicoincahuun. Non isca huashu, —Un minhuun noiran, —ifiatan yopaifo cuscan non inanyamacai sharama. Non ato shara huacoinshon non ato noicointiro.

19 Ascaquin non tapitiro Jesús iconcoin noco tapima cuscan non ai. Ascan ahuun ointaifi ratutama nocon nomuran unimatiro.

20 Ascafia nocon nomuran non shinanquin isca huai, —Un ahua chaca huamaran, —non iflaiton Diosin nocon nomuran nantifi tapicoian.

21 Ascan uhuun yoramishtichin, nocon nomuran non shinain cuscan non chaca huayamashucái Diosqui rafipaitiroma. Non aqui ranotamarocon non afu isharapai.

22 Non anori shinainfin Upa Diosin noco yonoai cuscan non aicain. Non ascaino nocoqui Upa

Diosin unimatiro. Ascatac non yocai cuscan noco inantiro.

²³ Noco isca huani, —Uhuun Facu Jesucristo icoínra huacahuun. Noinancahuun, —noco huani.

²⁴ Ascan tsoan Upa Diosin yononi cuscashu afu rafumisi itiro. Upa Diosin ahuun Yoshin Shara nocoqui nichini. Ahuunshon non tapitiro Upa Diosin no fu icacainaiton.

4

Ratomun Diospan Yoshin Shara iyamarai Satanás yoshin chaca non tapitiro

¹ Uhuun yoramishtichin, ratoran futsafoan mato yoiquin isca, —Un mato Diospan tsain yoiran, —ifiacaquin atirifoan paramisifo. Ascaiton ato nicashon man Diosin tsain ointiro. Aton tsain ascacoinyamaiton man tapitiro Diospan Yoshin Sharahuunshon mato yoiama. Diosin ato yonoama.

² Ascan tsoan yoiquin isca huaquin, —Jesucristo nan Diospan Furun Apa ariashu mai ano oni no-cofunucoin ishquin, —ishon mato anori yoiaiton Diospan Yoshin Sharahuunshon mato yoiaiton man tapitiro.

³ Ascan tsoan mato Jesushuunoa yoipaiyamaiton man tapitiro aacai Upa Diospan yorama. Diosihuunshon mato yoitamarocon Jesús noicasmaifohuunoa mato yoi. Man man nicamisi nan cuscara yorafo manifoti foanfafaincani. Natianri nantífi mai ano icafo ascacani. Yoshin chacapan Jesús noicasmaquin ato yonoa.

⁴ Mancai ascaranma uhuun yoramishtichin. Manfin Diospan facufoquin. Diospan Yoshin Shara matofu ipanaca. Atofin Satanás finoncoianquin. Ascacun marifi ahuunshon Jesús noicasmafoti man finoncoianquin. Nanfo Satanás ato iquina. Mato amaquiri tapimapaicani. Ascafainfoan ato tanatamarocon Jesús tsain man nicaquin finacoian.

⁵ Nanfoancai icoinra huacanima. Diosin shinain cuscacai shinancanima. Jesús icoinra huamafoan shinainfo cuscan futsafori tapimapaicani. Ascan icoinra huamafoan nannorisi shinanquin ato nicapaicaquin.

⁶ Ascashon non tapitiro ratofoanmain Diospan Yoshin Sharahuunshon noco icon yoiyamaraquin yoshin chacahuunshon noco parapaicain. Non tapitiro isca huaquin. Nonfin Diospan yorafoquin. Tsoan noco nicapai afin Diospan yoraquin. Ahuun Yoshin Sharahuunshon noco icon yoi. Ascan tsoan noco nicapaima aacai Diospan yorama. Yoshin chacahuunshon noco parapaitiro.

Non futsafo noicoinquin tapitirofo non Diosi frumisicoin

⁷ Uhuun yoramishtichin, Upa Dioshuunshon non yorafo noitiro. Ascashu non noinanoncahuun. Tsoa Diospan facuashu afu rafui. Ascan-shon futsafo noicointiro.

⁸ Upa Diosin noimisisquin. Ascan tsoan Dios noiyamaquin onancoiantaima.

⁹ Upa Diosin nocohuun noiquin noco ismani isca huaquin. Ahuun Furun fusti manifoannati-huunshon nichini ahuunoashu non afu nipanon.

10 Mai ano nichini nocohuunoashu noco nashonon nocon chaca soashoshquin. Nan shinanquin non tapitiro Upa Diosin noco noicoinmisi. Noiaicoin futsacai ascaranma. Noncrai futsafo noiflai ascatiroma.

11 Ascan uhuun yora mishtichin, Upa Diosin noco fasi noicoin norifi non noinanoncahuun.

12 Tsoan Upa Diosin oinyamafiamisishaquin noinanquin non tapitiro no fu ica. Non asca huafafainquin Diosin noco noiai cuscan norifi ahunshon futsafori non noitiro.

13 Ahuun Yoshin Shara nocoqui nichini. Ascacun non tapitiro no fu ipanaca. Ascariflai non afu ipanaca.

14 Non oinni cuscan non mato yoi. Upa Diosin Furun nichini manifoannati aton numamisi inon.

15 Ascan tsoan yoiquin isca huai, —Jesusfin Diospan Furunquin, —huafin Upa Diosin afu ipanacaquin. Ascariflai Upa Dios fu ipatiroquin.

16 Ascan noco noicoiainton non mumisi. Nantianri noco noiyaiton non icoinalra huatiro. Diosin nantifihuun noimisiquin. Tsoan afu rafushon futsafori noicoinmisi. Ascariflai Upa Diosin afu rafupacunaca.

17 Non afu rafuashu noco amapaiyai cuscan non noinancointiro. Ascatacun non Upaqui nocoaitian non ranotiro. Noco yoia cuscain non ratutamarocon non unimatiro. Nantianri Upa Diosin manifoannati ato yoishquin ratofoanmain chaca huayamaraquin nicasharamisiquin.

18 Noco noiai tapiashucal non ratutiroma. Non noiyamashu, —Upa Diosin ua onaintimairan, —icashu non ratutiro. Tsoan anori shinaincay

Diosin noco noiai cuscan aimá. Ascaflashu Diosin noco noiai cuscan aquin non ratu potatiro.

¹⁹ Non Upa Diosihuun noiataima afincoin nocohun noitauni. Nocohuun noiaino norifi natian non Upahuuri noicointiro.

²⁰ Tsoan yoiqui isca huai, —Un Upa Dios noicoinran, —ifiashon futsa noicoianma. Aafin chanimisiquin. Futsa oinfiaquin noiyamashocai Diosiri oinyamaquin noicointiroma.

²¹ Upa Diosin noco isca huaqui yononi, —Ua noishon futsafori noicoincahuun, —ishon yoini.

5

Non Jesús icoinra huacoinquin non ahuunshon futsafo noitiro

¹ —Jesús Diospan Furun. Diosin catonni nocon Numamisi inon, —tsoan icoinra huaiton Upa Diosin ato funa cuscara imatiro ahuun facufo inonfo. Ascan tsoan Upa Dios noiquin ahuun facuri noitiro.

² Ascan non Dios noishon noco yonoa cuscan aquin non tapitiro ahuun facufori non noicoin.

³ Upa Diosin noco yoia cuscan aquin non ahuunshon Dios noicointiro. Noco yonoa cuscacai curushma. Upa Dios noiashu noco yonoa cuscan non unimatiro.

⁴ Non Upa Diosin facushoncái ahuara chacafoan noco shinanchacemapaiyai cuscan afoancai noco funomatiroma. Diospan Furun Jesucristo icoinra huashu ahuarafóan noco chaca huamapaiyai cuscan non finontiro.

5 Ahuara chacafoan noco funomapai Diosin noco imapaiyai cuscan non anomma. Ascafia Jesucristo Diospan Furun non icoinra huashon ahuunshon na chacafo non finontiro chaca huashquima. Nan icoinra huafoansi finontiro.

6 Man non tapia Diospan Furun nocofunu ini. Un oinmisi cuscan un mato yoi man icoinra huacinnon. Nan Jesús unu muran iquimamuaino Upa Diosin yoini isca huaquin, —Naafin uhuun facuquin, —ishon yoini. Jesús naitianri ahuun imi foaino Apa Diosin noco tapimani nanton ahuun Furumun. Ahuun Yoshin Shara iconmisi arifi nocon nomuran yoimisi Jesús Diospan Furun.

7 Ascan rafu non fustiton nannorisi yoiquin Jesús nocofunu nan Diospan Furuquin.

8 Jesús unu muran iquimanitian yoifain naitian ahuun imi foni cuscan tapimafain Diospan Yoshin Sharari noco yoimisi. Nannori fosi yoiquin rafu non fusti huani.

9 Ascan yorafoan noco ahuara yoiaiton icoinra huatan Upa Diosin noco yoiai cuscan mima huaquin non icoinra huacointiro. Acai yora cuscarama. Aafin Dioscoinquin. Ascan ahuun Furunhuunoa noco yoiaiton non icoinra huacointiro.

10 Tsoan Diospan Furun icoinra huashon Apan Diosin ahuunoa yoini cuscan ahuun nomuran icoinra huatiro. Ascafiaqui ahuun Furunhuunoa yoimisi cuscan tsoan icoinra huayamashon nanton, —Dios chaniran, —ishon yorafo shinanmapai.

11 Isca huaquin Upa Diosin yoini, —Uhuun facuhuunshon un mato nimapacutiroran, —ishon yoini.

¹² Tsoa Furun fu rafuafin nipanacaquin. Ascafia tsoa Furun fu rafuamacai nipatiroma.

Ahuun unutaqui ato yoisharani

¹³ Jesús Diospan Furun man icoinra huaa. Ascan un mato nanfo cunushoni man nipanaca man tapinon.

¹⁴ Non Upa Dios cufiai cuscan arifiasca huapaiquin nocashontiro. Ascaino ranotama non Upa cufitiro. Noco ashoincuscan tapicoinshquin.

¹⁵ Noco nicaiton non tapisharatiro ahuara non yocacuscan nocashoiton.

¹⁶ Ascan tsoan Jesús icoinra huafashion chaca huaiton oinquin non Upa cufishotiro chaca shatunon. Ascan Upa Diosin ato numatiro nipanonfo ato imasharatiro. Ascafia futsafoan ipaitsi Jesús ifoancoinnna ointsa iyofashion chipo potacoian. Chaca shinanfafainquin Dios cachiquiri huacoinnafo. Ascarafocai tsoashtan numatiroma nipanon. Naashu omitsispacunacafo muran focani. —Ahuunoa Upa cufishocahuun, —ishoncái un mato anori yoima.

¹⁷ Upa Diosin nocoo amapaiyai cuscan ayamashu chacacoin itiro. Nan chacaflo huaifoan non Upa cufishotiro aton chaca shatunonfo Upa Dios fu ipashquin.

¹⁸ Ascan non tapia ratoranfo Upa Diosin ahuun yoracoinshocai chaca huafafaintiroma. Diospan Furunmun ato cushusharatiro nan yoshin chacanun ato achinonma chaca huamashquin.

19 Man non tapiari non Diospan facufo. Nan icoinra huafoma ahuun facufoma. Manifoannati nan yoshin chaca ato iquina.

20 Diospan Furun oni Dios iconmisiton noco tapimanon. Ahuunoashu non Upa Dios nan iconmisi fu non ipatiro. Furunri Diosicoin no fu ipanaca. Ascan noco nimapacutiroquin.

21 Ascano uhuun facufoan, ahuaraofo Diosicoinma shinanyamacahuun. Nanti.

Juan

Diospan Tsain

New Testament in Sharanahua (PE:mcd:Sharanahua)

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

8402923d-fd05-5a85-a7ae-203f04ecb375